




# Parasguladers da biaras naziuns

L'jamna vegnenta ha liug a Mustér ina concorrenza dil cup mundial da parasgular



L'autra jamna ein ils parasguladers puspei da veser savens sisum la Surselva. Els partan ed arrivan a Mustér. MAD

DA HANS HUONDER / ANR

■ **Rodund 130 parasguladras e parasguladers digl entir mund semesiran l'autra jamna a Mustér. Igl ei in'ulteriur grond arranschament internaziunal da quei sport en Surselva.** Che la regiun vegn adina puspei risguardada persunter ha in motiv principal. «Gest tenor relaziuns meteorologicas savein nus sgular cheu rutas denter 40 e 120 kilometers», di *Marc Demont*, president dils Surselva Flaigers. Ensemen cun l'Uniu Disentis Open organischan els dapi onns concorrenzas naziunalas ed internaziunalas en

Surselva. Alla partenza dil cup mundial ein ils megliers parasguladers dil mund e denter quels s'audan surtut era ils Svizzers ch'ei era uonn favorits. Il cup mundial ha liug uonn per la secunda ga a Mustér. In'ulteriura ga ei vegniu arranschau cheu in precup mundial ni era autras concorrenzas naziunalas ed internaziunalas. L'Uniu Surselva Flaigers ch'ei conresponsabla per l'organisasiun dumbra il mument rodund 50 commembras e commembers. Tenor Demont ei il zenit dil diember da commembers

vegnius contonschius avon rodund 20 onns. Lu dumbra l'uniu rodund 100 commembers. L'uniu ch'ei vegnida fundada 1992 organischa buca mo concorrenzas libras, mobein era differents arranschaments interns. Aschia vegn la cameradaria tgirada e leutier vegnan ils aspects dalla tecnica e dalla segirtad da sgular tematisadas. Ils Surselva Flaigers ein in da plirs clubs da parasgular el Grischun. Il cup mundial da parasgular entscheiva sonda e cuoza l'entira jamna vegnenta.



La Quotidiana  
 7007 Cuir  
 081/ 255 57 10  
 www.laquotidiana.ch

Medienart: Print  
 Medientyp: Tages- und Wochenpresse  
 Auflage: 4'063  
 Erscheinungsweise: 5x wöchentlich

Seite: 3  
 Fläche: 64'348 mm²

Auftrag: 1077450  
 Themen-Nr.: 048.002

Referenz: 66220945  
 Ausschnitt Seite: 1/2

# Ils megliers semesiran el tschiel sursilvan

L'jamna vegnenta ei a Mustér cumpleinamein ell'enzenna dil sport da parasgular



Marc Demont presidescha ils Surselva Flaigers ch'ei conorganisaturs dil Cup mundial da parasgular dall'jamna vegnenta a Mustér.

FOTO H. HUONDER

DA HANS HUONDER / ANR

■ **Rodund 130 parasguladras e parasguladers digl entir mund semesiran l'jamna vegnenta en Surselva. Igl ei ina da tschun concurrenzilas dil Cup mundial d'uonn. L'organisaziun eis els mauns dall'Uniu Disentis Open sco era dils Surselva Flaigers.** Sgular cun delta e parasgulader ei in'activitad ch'ins enconuscha en Surselva dapi 25 onns. Gest aschia veglia ei lu era l'uniun Surselva Flaigers che sa festivar uonn il giubi-

leum d'in quart tschentaner. Ina fiasta pli gronda ei buca previda en quei connex. «Cul cup mundial havein nus en sesez d'ina lavur e per quei motiv essan nus sedecidi da desister d'ina fiasta. Forsa dat ei enzatgei en ina rama pli pintga», di *Marc Demont* da Mustér che presidescha l'uniun dapi rodund dus onns. Ils Surselva Flaigers ein numnadamein partenaris dall'Uniu Disentis Open ell'organisaziun dallas concurrenzilas internaziunalas da parasgular a Mustér, uonn il cup

mundial. Leutier segidan era commemoras e commembers da Vol liber Grischun vid la lavur ch'ei da far avon, durent e suenter igl arranschament.

## Tudestg da Sursaissa

Surselva Flaigers ei in'uniun che consista il mument da rodund 50 commembras e commembers. Biars ein Sursilvans, mo entgins era dalla Bassa. Igl ei hosps da vacanzas permanentes dalla Surselva ni possessurs da secundas habitaziuns. Rodund



tschun onns sunter la fundaziun dall'uniun dumbrava ella rodund 100 commembras e commembers. Quei ei lu era stau il zenit. «Sgular cun delta e parasgular ei restau in sport agl ur. Igl ei buca sesviluppau ad in sport da massa», constatescha Demont. Fertion ch'ils deltists eran all'entschatta aunc in pulit grond diember, exequeschan paucs aunc oz quell'activitad ell'aria. Il parasgular ha priu fermamein la domena. Il num Flaigers ei dil reminent buca aschi jasters sco quei ch'ins pudess tertgar. «Flaigers deriva dil tudestg gualser da Sursaissa e vul dir sgular. Pliras persunas da Sursaissa ein stadas naven dall'entschatta ed ein aunc oz commembras dall'uniun», declara Demont.

#### Plirs arranchaments

La gronda part dallas commembras e dils commembers ei en ina vegliadetgna denter 35 e 60 onns. Ils giuvens ein en ina minoritad. «Sche nus havessen cheu tier nus ina scola da parasgular, vesess quei segiramein ora auter. In tempset havein nus giu ina tala, mo la regiun ei semplamein memia pintga per ch'in tala savess vegnir menada professiunalemeins, vul dir da persunas en ina piazza cumpleina», di Demont. Quei che seigi il mument buca, sappi forsa denton aunc daventar realitad: «En connex cun las investiziuns che las Pendericas Mustér SA fan, savess ins far il parasgular aunc pli attractivs ils proxims onns. En mintga cass eis ei era egl interess dallas pendericas da promover aunc pli fetg quei sport.» Sper las concurrenzas internaziunales ch'ils Surselva Flaigers gidan ad organisar, porschan els era plirs arranchaments interns. Mintg'onn organischan els in cuors da segirtad, in'excursiun cun parasgular, il campinadi intern dil club, il Cup Lucmagn en fuorma d'in parcour sco era ina sentupada cun pachetar ils parisols da segirtad.

#### Era uonn in Cup mundial

Il Cup mundial ha liug uonn per la secunda ga a Mustér. Leutier vegn aunc in pre-cup mundial, aschiadadir in'emprova generala avon che la Surselva vegni risguardada definitivameins persunter. Tenor Demont eis ei ina da tschun concurrenzas dil cup mundial d'uonn. Las biaras han liug ell'Europa. Entochen ussa ein rodund 130 parasguladras e parasguladers s'annunziat. La gronda part deriva dall'Europa, mo lu era dall'America e dall'Asia. Ils Svizzers s'audan danovameins denter ils gronds favorits da quei cup mundial. La qualitad da quels taxescha Demont suandontameins: «In campinadi svizzer ei sin in pli ault nivel ch'in cup mundial. Il motiv ei che la Svizzera ha biars excellents parasguladers e sche quels semesiran denter els, ei la qualitad automaticameins meglia. Leutier ein ils Svizzers endisai vid las relaziuns da sgular alpinas.» Che la Surselva vegn adina puspei tschercada per concurrenzas internaziunales ha in motiv special: «Naven da Mustér savein nus sgular entochen Cuera. Lu existan era pussevliadads da sgol ellas valladas encunter sid sco la Lumnezia ni la Val Sumvitg. Gest tenor relaziuns meteorologicas savein nus porscher differentas rutas denter 40 e 120 kilometers.» Las rutas vegnan fixadas mintga di cun risguard dallas relaziuns dall'aura. Gest tenor cundiziuns sa ei era esser ch'ei dat in di negina concurrenza. Tenor Demont ein concurrenzas internaziunales da parasgular sco il cup mundial buca pussevlas da realisar senza il sustegn da sponsurs. Per impedir conflicts cun la selvaschina ein ils organisateurs en contact permanent cun la surviglonza da catscha. Il cup mundial a Mustér ha liug dils 5 entochen ils 12 d'uost 2017.